

JO

Schöne Pulver

JO-Skitour aufs Doldenhorn 3638m ü.M. am 27./28. März 2021

Dr Nachwuchs weis wie chilli, drumm heimr ersch ufe Mittag dr Zug Richtig Kanderstäg gnoh. Im Ufstig id Hütte hett üs dr Leo ds Spitzcheeri 2.0 biibracht. Em Näbu sei Dank, heimr gar ni gseh a was fr Feuswänd mr richtig Hütte si vrbigloffe. (d Ussicht vor Hütte wär übrigens schön, d Sicht bi Vollmond hetts üs bewise). 5 Minute nach dr Akunft hets ä super Wäg gä zum WC. (Trittsicherheit erforderlich).

Im obere Stock geisteret dr Hüttewärter dsume (siehe Bild).

Dì üsserst umsichtig Chuchi-Crew hett oh 3 Mau nachgefragt ob oh würklech aui gärn Chümi hei. Dr Drügänger hett aune gmundet. (bis uf di heissi Schoggi zum Abwäscher spare) d Toureplanig isch sehr harmonisch vrloffe, bis zur Diskussion um weli Zitt dsme jitz mit dr Zitumstellig mues ufstah. Bis hütt simer üs ni sicher, um weli Zitt mir jitz ufem Gipfu si gstange. Isches am 1 Winterzit? Oder glich am 12 Summerzyt? Kene chunnt drus... Am nächste Tag simer am 5 (oder glich am 6i?) ufgstange und hei rack zack Zmorge gässe, u mitem erste Tageslicht simer richtig Punkt 2500 gloffe.

Mit gueter Gschwindigkeit sin mir denn bim erschte Tageslicht uffgstiege. Ganz allei sin mir zwar nitt gsi, doch hett sich alles guet verteilt. Spitzkehri um Spitzkehri hän mir uns langsam uffgeschafft. Erscht hett mes für unmöglich ghalte, dass mir a däm Nordweschthang no d Sonne gsehn. Doch nochem Uffstieg durch e schönes Couloir hett sie uns denn willkommme gheisse. S Tagesziel (luut dä superschiide Uhre) vo 10 Stockwerch Stegetritt mache hemmer denn gad abhogget. Vum Gletscher hemmer gar nöd vill gseh willer so schön überschneit gsi isch und mir henden ohni Problem chönne passiere. Dä Wind het üs immer wider e Abchüelig verpasst idem er üs eismol nochem andere Schnee is Gsicht blöse het. Dobe ahcho hemmer e super 360 Grad Ussicht gnosse. Ds Gipfufoto hetts natürlech o gä, o wenn nume um dBilanz vo +/-10% ds bestätige. DAbfahrt hett nis unverhoffte Pulver botte (ussert im Couloir, dert hett ds Abrütsche vor auem Krämpf usglöst). Öppe 1000 hm wiiter unge isch no grad es zwöits Couloir choo... machbar, isch aber e sogenannte Komfortzoneerwiiterig. Uf em Wan-

derwäg geits besser ohni Schii aus mit (je nach dem, ob si neuer oder äuter si zieht me se früecher oder später ab). Nachem Bärettritt simer nume no churz uf dr Strass gloffe, u de si mer dsletschte Stück uf ere summerleche Piste abegfahre. Die auerletschti Schlüssusteu (ds schribe vom Bricht) hei mer nach ere Glace/Schorle/Kafi-pouse im Zug zeme bewüetiget.

Tourenleiter: Leo-Philipp und Sämi
Teilnehmer: Noah, Marika, Mathias, Moritz, Laurin, Meret, Sarah
Bericht: alle Teilnehmer

Impressum

Bern, Nr. 2-2021, 99. Jahrgang,
 Erscheint 4-mal jährlich
 Verantwortliche Redaktorin:
 Irene Rietmann, Tel. 079 292 58 73
 Zustellung an alle Sektionsmitglieder
 ISSN-Nummer: 1662-6761

Redaktion
 Text- und Bildbeiträge an Sektion Bern SAC
 Brunnigasse 36, 3011 Bern
 kommunikation@sac-bern.ch

Die männliche Schreibweise schliesst, wo nicht anders erwähnt, automatisch beide Geschlechter ein.

Layout, Gestaltung, Druck, Versand
 rubmedia AG, Postfach, 3001 Bern
 Tel. 031 380 14 80
 E-Mail: info@rubmedia.ch

Inseratenannahme
 rubmedia AG, Postfach, 3001 Bern
 Elsbeth Graber, Tel. 031 380 13 23
 E-Mail: zeitschriftenverlag@rubmedia.ch

Adressänderungen, Eintritte/Austritte,
 Todesfälle an: Klaus Rapp, Mitgliederdienst,
 Brunnigasse 36, 3011 Bern
 Tel. 079 345 29 20, mitglieder@sac-bern.ch
 oder via Webseite: www.sac-bern.ch

Nr. 3-2021
 Erscheinungsdatum: 18. August 2021
 Redaktionsschluss: 16. Juli 2021
 Redaktion: Irene Rietmann
 Tel. 079 292 58 73



Papier: Rebello FSC® – Recycling, matt
 100% Altpapier, Blauer Engel



Hüttenromantik pur im Winterraum der Doldenhornhütte. Das Foto zeigt uns nach der Tour: erschöpft, aber gut gelaunt. Die herausfordernde Abfahrt ins Tal steht uns noch bevor...